

Unapređenje učešća mladih u Bosni i Hercegovini



Misija OSCE-a u Bosni i Hercegovini (Misija) daje veliki značaj radu za mlade i sa mladima, smatrajući da su upravo mladi ključni partneri za pozitivne promjene, društvenu koheziju i održivi razvoj.

Rad sa mladima je važan dio programskih aktivnosti Misije, što je potvrđeno i time da su pitanja mladih i formalno integrisana u strukturu organizacije. Jedinica za rodnu ravnopravnost i mlade, zajedno sa internom mrežom kontakt osoba za rad sa mladima, kao i drugim kolegama iz Misije, je tu da se postara da perspektive mladih budu integrisane u sve aspekte rada Misije.

Misija cijeni jedinstven način na koji mladi promovišu optimističan pogled na budućnost kroz unapređenje

međusobnog razumijevanja, pomirenja i regionalne saradnje te njihovu želju da zaštite norme koje čine temelj demokratskog upravljanja. Nažalost, sve veća isključenost iz političkog i javnog života, kao i rastući osjećaj marginalizacije, mladima postaju sve veći izazovi. Svojim programskim aktivnostima na jačanju demokratske političke kulture mladih i njihove sposobnosti za konstruktivan dijalog, Misija nastoji povećati njihov građanski angažman i političko učešće.

Političko učešće

Misija je razvila i pilotirala sveobuhvatan program obuke za omladinske forume parlamentarnih stranaka na više lokacija u Bosni i Hercegovini. Cilj programa je jačanje kompetencija i vještina mladih političara i političarki, kako bi mogli aktivno doprinosti razvoju lokalnih i omladinskih politika, posebno u oblastima ljudskih prava, rodne ravnopravnosti i borbe protiv diskriminacije.

Nakon obuka, angažman sa polaznicima i polaznicama obuka se nastavlja kroz umrežavanje i zajednički rad na lokalnim politikama i inicijativama, a sâm program se proširuje da bi uključio nove učesnike.

U partnerstvu sa Uredom za demokratske institucije i ljudska prava pri OSCE-u (ODIHR) i u saradnji sa 11 najvećih i najuticajnijih političkih partija u BiH, Misija razvija jedinstvenu metodologiju OSCE-a za provođenje revizija omladinskog učešća unutar političkih partija. Ove revizije, koje se trenutno testiraju u BiH, imaju za cilj pružiti konkretne preporuke za poboljšanje statusa i uticaja mladih unutar partijskih struktura.

Jačanje kapaciteta

Kroz projektne aktivnosti, Misija je organizovala različite oblike edukacija i radionica za studente univerziteta i srednjih škola širom BiH. To uključuje obuke o slobodi vjere i uvjerenja, trgovini ljudima,

ratnim zločinima i zločinima iz mržnje, nenasilnoj komunikaciji i jačanju dijaloga, borbi protiv korupcije i prepoznavanju i prijavljivanju koruptivnih radnji.

Pored toga, Misija je uspostavila godišnju školu medijskog prava, koja sada čini redovan dio programa Univerziteta u Sarajevu. Također, Misija podržava ljetne škole sigurnosti, državno takmičenje u simuliranom suđenju za studente prava i ostale obrazovne aktivnosti za mlade.

Mladi i sigurnost

Perspektive mladih su integrisane i u naš "Projekat za izradu, implementaciju i usklađivanje dokumenata, programa i zakonodavstva iz oblasti sigurnosti", čime Misija doprinosi sprovođenju Rezolucija Vijeća sigurnosti Ujedinjenih naroda (UNSCR) 2250 (2015), 2419 (2018) i 2535 (2020) o mladima, miru i sigurnosti. U okviru svojih aktivnosti, Misija se fokusira na uključivanje mladih u reforme sektora sigurnosti i njihovo učešće u jačanju kapaciteta BiH za kibernetičku sigurnost. U redovnoj komunikaciji sa partnerima, Misija zagovara da mladi budu dodatno uključeni u rad nadležnih državnih i entitetskih agencija. Misija organizuje i OSCE-ov godišnji događaj o dizanju svijesti o kibernetičkoj sigurnosti, (OSCE Cybersecurity Awareness Month) koji se završava IT sajmom, gdje mladi imaju priliku učestvovati i diskutovati o temama iz ove oblasti. Sve navedene aktivnosti pomažu Misiju da prati na koji način BiH ispunjava obaveze iz Rezolucije 2250, kako bi identifikovala oblasti za dalji angažman i rad sa lokalnim vlastima.

Mladi i ekologija

Kroz provedbu redovnog Programa pravne klinike za zaštitu životne sredine za studente i studentice prava, Misija doprinosi osposobljavanju nove generacije pravika i pravnica i pokušava da motiviše mlade ljude da svoju karijeru usmjere ka oblasti zaštite okoliša. Misija trenutno iznalazi načine da ovaj program proširi na sve državne pravne fakultete u BiH. Jedan od konkretnih koraka je pokretanje dijaloga o uspostavljanju postdiplomskog studija iz oblasti ekološkog prava sa Pravnim fakultetom Univerziteta u Sarajevu. Cilj inicijative je sistematski osposobljavati nove generacije stručnjaka za zaštitu okoliša.

Paralelno s tim, Misija pruža podršku omladinskim ekološkim inicijativama (npr. akcije čišćenja i reciklaže) s ciljem podizanja ekološke svijesti i podsticanja aktivnog angažmana mladih u zaštiti okoliša.

Mladi i izgradnja povjerenja

Misija kontinuirano podržava različite inicijative koje podrazumijevaju uključivanje mladih u dijalog i izgradnju povjerenja, najčešće kroz direktno uključivanje mladih u međureligijski dijalog, društvenu koheziju, međuetnički dijalog i zajedničke aktivnosti koje promovišu kulturne aktivnosti preko međuentitetske linije.

Lokalni kontekst – omladinske politike i omladinske strukture

Misija sarađuje sa svim nivoima vlasti u zemlji i zalažemo se za usvajanje potrebnih politika i drugih strateških dokumenata i integraciju omladinskih pitanja u opšte razvojne politike koje bi poboljšale položaj mladih. Zahvaljujući naporima Misije, neke opštine i kantoni su usvojili politike i strategije koje se direktno ili indirektno odnose na mladu populaciju.

Osim državnih institucija, ključni partneri Misije na terenu su i različite omladinske nevladine organizacije i opštinska vijeća/savjeti mladih. Ova vijeća su često uključena u izradu i implementaciju lokalnih omladinskih politika i općenito predstavljaju interese mladih na lokalnom nivou. Iako su ista važna komponenta pravnog okvira oba entiteta, ona ne postoje niti djeluju u svim opštinama u BiH. Prepoznajući njihov potencijal, Misija radi na osnivanju i jačanju vijeća mladih širom zemlje.

Na višem nivou, Bosna i Hercegovina nema jedinstveno državno vijeće mladih, već postoje tri: po jedno za svaki entitet i jedno za Brčko Distrikt BiH, svako osnovano prema svom zakonu o mladima. Vijeća djeluju primarno u okviru svojih nadležnosti, predstavljajući interese mladih kroz zakonom propisane institucionalne okvire. Njihova međusobna saradnja predstavlja ključni element u promovisanju inkluzivnog učešća mladih na nivou cijele države.

Uprkos složenoj i decentralizovanoj političkoj strukturi BiH, vijeća mladih aktivno grade međusobnu saradnju te jačaju međusobnu koordinaciju i integraciju u širi bosanskohercegovački i regionalni omladinski diskurs. Sve su prisutniji u prostorima zagovaranja, forumima za jačanje institucionalnih i organizacionih kapaciteta te u procesima izrade politika i strategija u oblastima obrazovanja, izgradnje mira i građanskog angažmana.

Za više informacija
skenirajte QR kod.



Misija OSCE-a u Bosni i Hercegovini
Fra Andela Zvizdovića 1, UNITIC Toranj A
71000 Sarajevo
Bosna i Hercegovina

Tel: +387 33 952 100
Fax: +387 33 442 479
press.ba@osce.org
<https://bih.osce.org/>

Pratite Misiju OSCE-a u BiH

